

Memorandwm Esboniadol ar gyfer y Cod Ymarfer diwygiedig ar arfer swyddogaethau gwasanaethau cymdeithasol mewn perthynas â chodi ffioedd ac asesiadau ariannol o dan Ran 4 a Rhan 5 (Codi Ffioedd ac Asesiadau Ariannol) o Ddeddf Gwasanaethau Cymdeithasol a Llesiant (Cymru) 2014.

Lluniwyd y Memorandwm Esboniadol hwn gan y Grŵp Iechyd a Gwasanaethau Cymdeithasol ac fe'i gosodir gerbron Senedd Cymru ar y cyd â'r cod ymarfer uchod ac yn unol â Rheol Sefydlog 27.14

Datganiad y Gweinidog

Yn fy marn i, mae'r Memorandwm Esboniadol hwn yn rhoi darlun teg a rhesymol o effaith ddisgwyliedig y cod ymarfer diwygiedig ar arfer swyddogaethau gwasanaethau cymdeithasol mewn perthynas â chodi ffioedd ac asesiadau ariannol o dan Ran 4 a Rhan 5 o Ddeddf Gwasanaethau Cymdeithasol a Llesiant (Cymru) 2014. Rwyf wedi fy modloni bod y manteision yn cyfiawnhau'r costau tebygol.

Julie Morgan AS
Y Dirprwy Weinidog Iechyd a Gwasanaethau Cymdeithasol

25 Ionawr 2023

Rhan 1 - TROSOLWG

1. Disgrifiad

Mae Deddf Gwasanaethau Cymdeithasol a Llesiant (Cymru) 2014 (y "Ddeddf") yn dwyn ynghyd ddyletswyddau a swyddogaethau awdurdodau lleol mewn perthynas â gwella llesiant pobl sydd angen gofal a chymorth, a gofalwyr sydd angen cymorth. Mae'r Ddeddf yn darparu'r sylfaen, ynghyd â rheoliadau a chodau ymarfer a wneir oddi tani, ar gyfer fframwaith statudol ar gyfer darparu gofal cymdeithasol yng Nghymru i gefnogi pobl o bob oed fel rhan o deuluoedd a chymunedau.

O dan y Ddeddf mae gan awdurdodau lleol ddisgresiwn i godi ffioedd am y gofal a'r cymorth y maent yn eu darparu neu'n eu trefnu i berson, neu'r cymorth y maent yn ei ddarparu neu'n ei drefnu i ofalwr. Mae ganddynt hefyd ddisgresiwn i osod cyfraniad neu ad-daliad ar gyfer taliadau uniongyrchol y maent yn eu darparu i berson i'w alluogi i drefnu ei ofal a'i gymorth ei hun. Mae hyn yn berthnasol i ofal a chymorth yng nghartref y person, yn y gymuned, neu mewn gofal preswyl. Os yw awdurdod yn dymuno arfer y disgresiwn hwn i osod ffi, cyfraniad neu ad-daliad, mae rheoliadau a wnaed o dan y Ddeddf yn rheoli'r trefniadau sy'n berthnasol i hyn.

Cafodd rheoliadau sy'n rheoli sut y mae awdurdodau lleol yn arfer eu disgresiwn i osod ffi, cyfraniad neu ad-daliad eu gwneud o dan Ran 4 (diwallu anghenion) a Rhan 5 (codi ffioedd ac asesiadau ariannol) o'r Ddeddf. Daeth y rhain i rym ar 6 Ebrill 2016. Cafodd Cod Ymarfer ar asesiadau ariannol a chodi ffioedd i gyd-fynd â'r rheoliadau hyn hefyd ei gwneud o dan y Ddeddf a daeth i rym ar 6 Ebrill 2016.

I gyflwyno nifer o newidiadau polisi ers i'r rheoliadau ddod i rym, gwnaed nifer o ddiwygiadau drwy reoliadau a ddaeth i rym ar 10 Ebrill 2017, 9 Ebrill 2018, 8 Ebrill 2019, 6 Ebrill 2020, 12 Ebrill 2021 a 11 Ebrill 2022. Roedd angen y rhain i ddiweddarau sawl set o reoliadau a wnaed o dan Rannau 4 a 5 o'r Ddeddf. Gwnaed hefyd ddiwygiadau i'r Cod Ymarfer i adlewyrchu'r newidiadau a wnaed gan reoliadau. Daeth fersiynau diwygiedig o'r Cod i rym ar 10 Ebrill 2017, 9 Ebrill 2018, 8 Ebrill 2019, 6 Ebrill 2020 a 11 Ebrill 2022 yn eu tro.

Nawr, cynigir newidiadau i'r rheoliadau a wnaed o dan y Ddeddf, sef Rheoliadau Gofal a Chymorth (Gosod Ffioedd) (Cymru) 2015 a Rheoliadau Gofal a Chymorth (Asesiad Ariannol) (Cymru) 2015. Bydd y newidiadau hyn yn dod i rym ar 10 Ebrill 2023. Maent yn adlewyrchu nifer o gynlluniau cymorth ariannol newydd a roddwyd ar waith gan lywodraethau eraill yn y DU ac y tynnwyd sylw Llywodraeth Cymru atynt. Maent yn rhoi eglurder pellach ynghylch nifer cyfyngedig o gynlluniau iawndal sydd eisoes yn cael eu diystyru o dan y rheoliadau er mwyn sicrhau eglurder i'r defnyddiwr terfynol. Mae llunio Cod diwygiedig hefyd yn gyfle i ychwanegu cyfeiriad at reoliadau diwygio codi ffioedd ac asesiadau ariannol sydd wedi dod i rym ers y diwygiad blaenorol. Bydd hyn yn sicrhau bod y Cod yn parhau i fod yn gyfredol ac yn effeithiol. Diwygiadau i'r Cod yw testun y Memorandwm Esboniadol hwn.

2. Materion o ddiddordeb arbennig i'r Pwyllgor Deddfwriaeth, Cyfiawnder a'r Cyfansoddiad.

Mae adran 146 o'r Ddeddf yn gosod y weithdrefn i'w dilyn cyn dyroddi a chymeradwyo'r Cod diwygiedig hwn. Bydd y fersiwn derfynol hon o'r Cod diwygiedig yn cael ei gosod gerbron y Senedd am 40 diwrnod. Ar ôl hynny, os na fydd unrhyw benderfyniadau wedi

eu gwneud, rhaid i Weinidogion Cymru ei ddyroddi. Nid oes unrhyw faterion eraill y dymunai'r Gweinidog eu tynnu at sylw'r Pwyllgor.

3. Y cefndir deddfwriaethol

Mae'r pwerau sy'n galluogi gwneud y Cod hwn wedi eu cynnwys yn adrannau 145 a 146 o'r Ddeddf. Mae adran 145 o'r Ddeddf yn caniatáu i Weinidogion Cymru ddyroddi, a diwygio o bryd i'w gilydd, un neu fwy o godau ar arfer swyddogaethau gwasanaethau cymdeithasol. Mae adran 146 o'r Ddeddf yn gosod y weithdrefn i'w dilyn wrth ddyroddi neu ddiwygio cod o dan adran 145. Cynigir bod y Cod diwygiedig hwn yn dod i rym ar 10 Ebrill 2023.

4. Diben y ddeddfwriaeth a'r effaith y bwriedir iddi ei chael

Mae'r Cod diwygiedig hwn wedi ei ddiwygio i adlewyrchu nifer o gynlluniau cymorth ariannol newydd drwy ychwanegu at y rhestr o fathau o gyfalaf y dylid eu diystyru'n llawn yn yr asesiad ariannol ar gyfer codi ffioedd am bob math o ofal a chymorth.

Darnau newydd o ddeddfwriaeth mewn meysydd heb eu datganoli a gyflwynwyd gan Lywodraeth y DU yw'r cynlluniau hyn sy'n gwneud taliadau i unigolion ac aelwydydd i'w cefnogi yng nghyd-destun y pwysau presennol ar gostau byw sy'n deillio o gynnydd mewn prisiau Ynni.

Mae'r cynlluniau cymorth ariannol newydd sydd i'w hychwanegu at y Cod yn cynnwys:

- Taliadau a wneir o dan y Cynllun Cymorth Biliau Ynni (EBSS)
- Taliadau Incwm Isel neu Gostau Byw i'r Anabl a wneir o dan Ddeddf Nawdd Cymdeithasol (Taliadau Ychwanegol) 2022

Mae llunio Cod diwygiedig hefyd yn gyfle i ychwanegu cyfeiriad at reoliadau diwygio codi ffioedd ac asesiadau ariannol sydd wedi dod i rym ers y diwygiad blaenorol. I'r perwyl hwnnw cyfeirir at Reoliadau Gofal a Chymorth (Gosod Ffioedd) ac (Asesiad Ariannol) (Cymru) (Diwygiadau Amrywiol) 2023 yn y Cod diwygiedig fel y bo'n briodol. Ar gyfer cyflawnder y gwneir hyn gan fod y rheoliadau yn diwygio'r prif reoliadau y cyfeirir atynt yn y Cod.

Mae'r cynlluniau iawndal presennol canlynol wedi eu diystyru'n flaenorol mewn rheoliadau o dan baragraff 20(1) o Atodlen 2 i'r Rheoliadau Asesiad Ariannol, ond maent bellach wedi eu rhestru ar wahân yn y Cod Ymarfer i roi eglurder i'r defnyddiwr terfynol:

- taliad Tŵr Grenfell,
- taliad camdriniaeth plant,
- taliad Windrush o dan Ddeddf Cynllun Iawndal Windrush (gwariant) 2020,
- taliadau a wneir gan Ymddiriedolaeth y Plant Mudol o dan y cynllun ar gyfer cyn-blant mudol Prydeinig.

5. Ymgynghori

Gan fod y Cod diwygiedig yn cynnwys nifer cyfyngedig o ddiwygiadau diystyru newydd a allai effeithio ar nifer bach o unigolion yn sgil newidiadau ym mholisi Llywodraeth y DU mewn meysydd heb eu datganoli, a chan nad yw'n adlewyrchu newid ym mholisi Llywodraeth Cymru, nid oes ymgynghoriad cyhoeddus ffurfiol wedi ei gynnal yn yr achos hwn. Addasiad technegol yn unig yw'r diwygiadau er mwyn sicrhau bod y Cod yn adlewyrchu'n gywir y cynlluniau cymorth ariannol newydd a nodir uchod i sicrhau bod

unrhyw ddyfarniadau a wneir i unigolion yn cael eu diogelu rhag codi ffioedd am ofal a chymorth.

RHAN 2 – ASESAD EFFAITH RHEOLEIDDIOL

Cyflwyniad

Mae'r newidiadau sy'n adlewyrchu diystyriadau newydd, a gyflwynir gan y rheoliadau diwygio, yn cael eu hystyried yn yr Asesiad Effaith Rheoleiddiol hwn.

Nid yw'r gyfradd y gosodir yr Isafswm Incwm arni wedi ei chynnwys yn y Cod Ymarfer. Mae wedi ei chynnwys mewn rheoliadau yn unig. Serch hynny, mae'r Memorandwm Esboniadol a'r Asesiad Effaith Rheoleiddiol hwn yn ymdrin â hi er cyflawnder.

Nid yw'r Asesiad Effaith Rheoleiddiol hwn yn ymdrin â'r newidiadau hynny i'r rheoliadau a'r cod ymarfer nad ydynt ond yn rhoi eglurder ynghylch y diystyriadau sy'n bodoli eisoes a nodir yn rhan 1.

Bydd cyflwyno'r newidiadau newydd yn sicrhau bod y Rheoliadau Codi Ffioedd a'r Rheoliadau Asesiad Ariannol, a'r cod ymarfer cysylltiedig, yn gyfredol ac yn gallu gweithredu'n effeithiol.

ISAFSWM INCWM

Opsiynau a Manteision

Mae'r Asesiad Effaith Rheoleiddiol hwn yn ystyried dau opsiwn mewn perthynas â gwneud y newidiadau hyn:

- Opsiwn 1 – “gwneud dim” a pheidio â gwneud y rheoliadau diwygio;
- Opsiwn 2 – “gwneud y rheoliadau diwygio” i gyflwyno newidiadau i'r Rheoliadau Codi Ffioedd mewn perthynas â chodi ffi am ofal a chymorth. Dyma'r opsiwn a ffeifrir.

Cefndir

Pan fo person mewn gofal preswyl, ac yn cael cymorth ariannol gan ei awdurdod lleol tuag at gost ei ofal, mae'n ofynnol iddo gyfrannu'r rhan fwyaf o'i incwm wythnosol tuag at y gost hon. Fodd bynnag, o dan y Rheoliadau Codi Ffioedd, rhaid i berson allu cadw swm o'i incwm i'w wario ar eitemau personol fel y mynna. Gelwir hyn yn Isafswm Incwm. Caiff lefel yr Isafswm Incwm ei hadolygu'n flynyddol i ystyried codiadau blynyddol i daliadau pensiwn y wladwriaeth y DU a budd-daliadau lles, sy'n sail i incwm wythnosol preswylwyr cartrefi gofal. Gan ystyried y codiadau hyn, mae Gweinidogion yn cynnig cynyddu'r Isafswm Incwm o 10 Ebrill 2023 ymlaen o'i lefel bresennol, sef £35.00 yr wythnos, i £39.50 yr wythnos. Bydd hyn yn caniatáu i breswylwyr gadw swm ychydig yn uwch o'u hincwm i'w wario fel y mynnant ar eitemau personol.

Opsiwn 1 – gwneud dim

Mae'r opsiwn hwn yn cynnal lefel yr Isafswm Incwm ar £35.00 yr wythnos. O ganlyniad, bydd yr holl gynnydd yn incwm wythnosol preswyllydd o fis Ebrill 2023 ymlaen o ganlyniad i'r codiad yn ei daliadau pensiwn y wladwriaeth a'i fudd-daliadau lles o fudd i'w awdurdod lleol ar ffurf incwm ffioedd i dalu tuag at ei ofal.

- Costau

Nid oes unrhyw oblygiadau cost newydd i lywodraeth leol o dan opsiwn hwn. Yn hytrach, byddai awdurdodau yn cael hyd at tua £12 miliwn y flwyddyn mewn cyfraniadau uwch

gan y 16,144 o breswylwyr cartrefi gofal dros oedran pensiwn y wladwriaeth fel y cofnodwyd mewn data a gyhoeddwyd gan Lywodraeth Cymru ym mis Hydref 2019 (nid oes data o'r fath wedi'u casglu ers hynny). Byddai hyn o ganlyniad i'r incwm uwch y byddai gan breswylwyr yn sgil y codiadau yn swm (£14.35 yr wythnos) pensiwn sylfaenol y wladwriaeth yn unig. Ni fyddai preswylwyr yn y sefyllfa hon yn cadw unrhyw faint o'r codiad a gyflwynir.

- Manteision

Ni fyddai unrhyw fanteision i breswylwyr cartrefi gofal a gefnogir gan eu hawdurdod lleol gan na fyddent yn gallu cadw unrhyw faint o'r cynnydd a gyflwynir i'w pensiwn y wladwriaeth. Ni fyddai'r rhai sy'n cael cynnydd i unrhyw fudd-dal lles y maent yn ei gael yn cael budd ychwaith. Yn hytrach, byddai'r arian hwn yn cynyddu cyfraniadau wythnosol preswylwyr i awdurdodau lleol am gost eu gofal, gan fod o fudd i'r ffrwd incwm y mae awdurdodau yn ei chael gan breswylwyr cartrefi gofal a gefnogir.

Opsiwn 2 – gwneud y rheoliadau diwygio

O dan yr opsiwn hwn, byddai'r rheoliadau diwygio yn cael eu gwneud i gynyddu'r Isafswm Incwm o'i lefel bresennol, sef £35.00 yr wythnos, i £39.50 yr wythnos. Byddai hyn yn caniatáu i breswylwyr a gefnogir gan awdurdodau lleol gadw tua thraean o'r codiad y maent yn ei gael i'w wario ar eitemau personol fel y mynnant.

- Costau

O dan yr opsiwn hwn, byddai awdurdodau lleol yn cael cynnydd llai mewn incwm ffioedd, nag y byddent pe na bai'r rheoliadau'n cael eu gwneud, o tua £8.3 miliwn y flwyddyn drwy gyfraniadau gan y 16,144 o breswylwyr dros oedran pensiwn y wladwriaeth yn unig. Byddai hyn o ganlyniad i'r incwm uwch y byddai preswylwyr yn ei gael yn sgil y codiadau ym mhensiwn y wladwriaeth. Byddai preswylwyr yn cadw cyfran (gyda'i gilydd tua £3.7 miliwn y flwyddyn) o'r codiad hwn i'w gwario ar eitemau personol fel y mynnant.

- Manteision

Mae'r opsiwn hwn yn rhannu'r incwm uwch y byddai preswylwyr a gefnogir gan awdurdod lleol yn ei gael o fis Ebrill 2023 ymlaen o ganlyniad i godiadau i'w taliadau pensiwn y wladwriaeth. Byddai preswylwyr yn y sefyllfa hon yn gallu cadw £4.50 yr wythnos o'r codiad hwn i'w wario ar eitemau personol, tra byddai awdurdodau'n cael y gweddill mewn cyfraniadau uwch gan breswylwyr tuag at gost eu gofal. Hefyd, byddai cynnydd yn yr Isafswm Incwm yn lleihau effaith y cynnydd diweddar mewn costau byw ac yn sicrhau nad yw gwerth yr Isafswm Incwm yn cael ei erydu mewn termau real.

Casgliad

O ystyried y budd ariannol a ddaw i ran preswylwyr cartrefi gofal, gan, ar yr un pryd, alluogi awdurdodau lleol i gael cynnydd mewn refeniw i'w ddefnyddio tuag at y gofal a'r cymorth y maent yn eu darparu neu'n eu comisiynu, ac at ansawdd y gofal a'r cymorth hwnnw, argymhellir "Opsiwn 2 – gwneud y rheoliadau diwygio". O ganlyniad, bydd awdurdodau lleol yn cael cynnydd mewn incwm ffioedd gofal preswyl o tua £8.3 miliwn y flwyddyn gan breswylwyr cartrefi gofal sy'n cael cyfradd sylfaenol pensiwn y wladwriaeth yn unig. Bydd hefyd yn sicrhau y bydd preswylwyr cartrefi gofal sy'n cael pensiynau o'r fath yn gallu cadw, gyda'i gilydd, tua £3.7 miliwn y flwyddyn i'w wario fel y mynnant.

CYNLLUNIAU CYMORTH ARIANNOL NEWYDD

Opsionau a Manteision

Mae'r Asesiad Effaith Rheoleiddiol hwn yn ystyried dau opsiwn mewn perthynas â gwneud y newidiadau hyn:

- Opsion 1 – “gwneud dim” a pheidio â gwneud y rheoliadau diwygio;
- Opsion 2 – “gwneud y rheoliadau diwygio” i gyflwyno diystiriadau newydd i'r Rheoliadau Asesiad Ariannol i sicrhau nad yw'r rhai sy'n cael taliadau, a wneir o dan y cynlluniau a enwir, yn gorfod defnyddio'r taliadau hyn tuag at gost eu gofal a'u cymorth. Dyma'r opsiwn a ffeifrir.

Cefndir

Mae nifer o gynlluniau iawndal a chymorth ariannol wedi'u sefydlu yn ystod y blynyddoedd diwethaf y mae angen eu cydnabod yn y Rheoliadau Asesiad Ariannol. Gan amlaf, darnau newydd o ddeddfwriaeth a gyflwynwyd gan lywodraethau eraill yn y DU, neu gan Lywodraeth Cymru, yw'r cynlluniau. Maent yn gwneud taliadau i unigolion neu aelwydydd, neu ddyfarniadau ariannol i unigolion sydd wedi dioddef niwed, camdriniaeth neu anaf ac sydd i gael taliadau i gydnabod eu dioddefaint.

Mae angen i'r cynlluniau cymorth ariannol newydd a gyflwynwyd gan Lywodraeth y DU yn 2022 gael eu cydnabod mewn deddfwriaeth i sicrhau, pan fo person i gael dyfarniad o dan un o'r cynlluniau a restrir, fod y taliad y maent yn ei gael yn cael ei ddiystyru wrth asesu incwm a/neu gyfalaf fel rhan o'i asesiad ariannol. Nid yw union nifer yr unigolion y bydd y diwygiadau rheoleiddiol hyn yn effeithio arnynt yn hysbys, ond gan fod y cynlluniau cymorth ariannol penodedig sydd â thaliad ariannol uniongyrchol yn rhai sydd wedi'u targedu, amcangyfrifir bod y niferoedd yn fach. Nodir y cynlluniau newydd yn Rhan 1.

Opsion 1 – gwneud dim

Byddai'r opsiwn hwn yn golygu na fyddai unrhyw newidiadau'n cael eu gwneud i'r mathau o gyfalaf neu incwm y mae rhaid eu diystyru'n llawn yn asesiad ariannol person. Byddai unrhyw daliad cymorth ariannol y mae person yn ei gael o gynlluniau o'r fath yn rhan o'i adnoddau ariannol cymwys ac yn cael ei ystyried yn llawn wrth asesu ei allu i dalu ffi am ofal a chymorth.

- Costau

Ni fyddai unrhyw oblygiadau cost newydd i awdurdodau lleol o dan yr opsiwn hwn. Yn hytrach, byddent yn gallu ystyried swm llawn y taliadau cymorth ariannol hyn mewn asesiadau ariannol. O ganlyniad, mae'n bosibl y byddai person yn gorfod talu ffi uwch am ei ofal a'i gymorth.

- Manteision

Nid yw'r opsiwn hwn yn rhoi unrhyw fudd i unigolion sy'n cael taliadau o'r fath ac yn hytrach byddai'n eu hatal rhag elwa ar y taliadau hyn a wneir i gynorthwyo cadernid ariannol yng nghyd-destun y pwysau presennol ar gostau byw sy'n gysylltiedig â phrisiau Ynni uchel. Yn hytrach, mae'n bosibl y byddai'n ofynnol i berson dalu ffi am y gofal a'r cymorth sydd eu hangen arno; ffi na fyddai wedi bod yn daladwy fel arall.

Opsion 2 – gwneud y rheoliadau diwygio

Byddai'r opsiwn hwn yn gwneud rheoliadau diwygio fel y byddai modd i unrhyw swm o gymorth ariannol y mae person yn ei gael o un o'r cynlluniau a enwir gael ei gadw'n llawn ac ni fyddai'n cael ei ddefnyddio tuag at gost ei ofal a'i gymorth.

- Costau

Ni fyddai unrhyw oblygiadau cost newydd i awdurdodau lleol o dan yr opsiwn hwn.

- Manteision

Byddai'r opsiwn hwn yn diystyru gwerth llawn taliadau cymorth ariannol y mae person yn eu cael o unrhyw un neu ragor o'r cynlluniau a enwir. O ganlyniad, byddai'n elwa'n llawn o'r taliadau a ddyfarnwyd iddo, fel y bwriadwyd.

Casgliad

O ystyried y ffaith mai bwriad dyfarniadau a wneir o dan y cynlluniau cymorth ariannol newydd hyn yw cefnogi cadernid ariannol yng nghyd-destun y pwysau presennol ar gostau byw, argymhellir bod Opsiwn 2 – "gwneud y rheoliadau diwygio" yn briodol ac yn angenrheidiol o dan yr amgylchiadau hyn.

Asesu'r Gystadleuaeth

Prawf Hidlo'r Gystadleuaeth	
Cwestiwn	Ateb
C1: Yn y farchnad/marchnadoedd y bydd y rheoliad newydd yn effeithio arni/arnynt, a oes gan unrhyw gwmni dros 10% o gyfran y farchnad?	Nac oes
C2: Yn y farchnad/marchnadoedd y bydd y rheoliad newydd yn effeithio arni/arnynt, a oes gan unrhyw gwmni dros 20% o gyfran y farchnad?	Nac oes
C3: Yn y farchnad/marchnadoedd y bydd y rheoliad newydd yn effeithio arni/arnynt, a oes gan y tri chwmni mwyaf, gyda'i gilydd, o leiaf 50% o gyfran y farchnad?	Nac oes
C4: A fyddai costau'r rheoliad yn effeithio ar rai cwmnïau lawer iawn mwy nag eraill?	Na fyddai
C5: A yw'r rheoliad yn debygol o effeithio ar strwythur y farchnad, gan newid nifer neu faint y cwmnïau/sefydliadau?	Nac ydy
C6: A fyddai'r rheoliad yn arwain at gostau sefydlu uwch ar gyfer cyflenwyr newydd neu ddarpar gyflenwyr nad oes yn rhaid i gyflenwyr presennol eu hwynebu?	Na fyddai
C7: A fyddai'r rheoliad yn arwain at gostau parhaus uwch ar gyfer cyflenwyr newydd neu ddarpar gyflenwyr nad oes yn rhaid i gyflenwyr presennol eu hwynebu?	Na fyddai
C8: A yw hwn yn sector sy'n gweld newidiadau technolegol cyflym?	Nac ydy
C9: A fyddai'r rheoliad yn cyfyngu ar allu cyflenwyr i ddewis pris, ansawdd, ystod neu leoliad eu cynnyrch?	Na fyddai

Adolygu ar ôl gweithredu

Mae'r Ddeddf yn cynnwys darpariaethau i ganiatáu i Weinidogion Cymru fonitro swyddogaethau ynddi a gyflawnir gan awdurdodau lleol a chyrff eraill. Caiff Gweinidogion Cymru ei gwneud yn ofynnol i'r cyrff hyn adrodd am eu dyletswyddau o ran gweithredu'r rheoliadau diwygio hyn.

Bydd Llywodraeth Cymru yn parhau i fonitro effaith y rheoliadau diwygio ar feysydd megis y Gymraeg, Confensiwn y Cenhedloedd Unedig ar Hawliau'r Plentyn, Pobl Hŷn a Chydraddoldeb.